

Poznato ko su djed i nena koji su ispred "Binga" u Kuli očistili smeće (Foto)

Jučerašnji tekst na našem portalu o tome kako su nena i djed očistili smeće ispred dućana "Bingo" u tuzlanskom naselju Kula, izazvao je veliko zanimanje i postao je mali hit na internetu.

Tekst je do ovog trenutka na društvenim mrežama vidjelo više oko 12.000 posjetilaca portala "Tuzla LIVE", a u mnoštvu komentara najviše je onih koji "djedu i neni" čestitaju na urađenom poslu, dosta je onih koji kritikuju mlađe stanovnike naselja što se nisu, umjesto dvoje penzionera, latili posla čišćenja krajolika punog smeća, dok mnogi smatraju da su zatajili "Komunalac" i "Bingo", zbog neodržavanja higijene u naselju i oko poslovnog objekta.

Bilo kako, danas smo uspjeli razgovarati sa vremešnim ekolozima iz Kule koji, kako su rekli, zajedno imaju 153 godine. Radi se o dugogodišnjim stanovnicima naselja, umirovljenicima, supružnicima Ezidi i Izetu Šeraku, nastanjenim u kući u Ulici 16. muslimanske brigade 1. Od dućana "Binga" dijeli ih samo dvadesetak metara strme ulice.

– Povod za radnu akciju bilo je to što smo prošle godine imali goste i oni su konstatovali da je okoliš prljav, a mi smo na to reagovali ove godine. Naime, uskoro nam ponovo dolaze dragi gosti i ne bih željela da vide smeće koje okružuje prostor oko naše kuće i dvorišta, te dijela mjesne zajednice. Katastrofa je kako je sve izgledalo. Nije u redu ni od "Binga" što ne vodi brigu o čistoći oko dućana, a ni od "Komunalca" koji kad pokupi smeće iz kontejnera, ostavi sve druge nečistoće oko njega. A za narod da ne pričam. Jučer smo satima sve čistili, pokupili svaki papirić, a već jutros je neko bacio hljeb – ispričala nam je Ezida Šerak.

Njen suprug Izet Šerak, nekada poznati sportski radnik, rukometni sudija, te dugogodišnji generalni sekretar SOFK-e Tuzla, kaže kako se nekada vodilo računa o higijeni svakog dijela grada, a danas to nije slučaj.

– Ne vode računa o okolišu ni mještani, a ni radnici "Komunalca", jer iza sebe ostavljaju mnoštvo papirića koje ljudi bacaju, onako, usput. Isprazne kontejnere, a okolo ostaju najlonske kese, opušci, boce, razna ambalaža. I radnici "Binga" morali bi više povesti računa o uređenosti prostora oko samoposluge – smatra 80-godišnji Šerak.

Naši sagovornici kažu da se ispred samoposluge okupljaju pijanci, koji u dućanu kupe pivo ili flašice alkohola, popiju ih, a boce bace u travu.

– Jučer sam pokupila tri vreće staklenih flaša, koje se mogu reciklirati, zatim, mnoštvo papira i kesa. Žaloso je da ljudi koji ovdje žive ne vode računa kuda će i kako proći, je li čisto ili nije. Ovdje živi dosta ljudi koji su se doselili tokom i nakon rata, pa su i neke svoje ružne navike donijeli. Ali, ne želim samo njih kritikovati, nego i domaće stanovništvo. Mislim da bi bilo dobro da se putem TV ljudi educiraju o tome šta je kultura življenja i kako se treba odnositi prema životnoj okolini – navodi Ezida Šerak.

Dok na Facebooku "nena i djed" dobijaju komplimente za ekološku svijest i jučerašnje čišćenje krajolika, u komšiluku im niko nije ni čestitao, a kamoli prišao da pomogne.

– Kad smo jučer izašli da očistimo okolinu, niko nas nije upitao ni šta to radimo, a kamoli da nam se pridruži. Mnogi su se sklonili i gledali kroz prozor šta to radimo. Mene to ne zanima, ja sam to očistila sebe radi, a satisfakcija mi je da barem trenutno čisto oko moje kuće i mog dvorišta. A to kako su se drugi ponijeli, njihova je stvar – kaže naša sagovornica.

Ukazuju i na problem neuređenog parkinga oko "Binga", gdje ljudi parkiraju automobile tako da je dućanu teško prići, pogotovo za lošeg vremena. Ni mjesna zajednica, a ni "Bingo" ne poduzimaju ništa da se uredi parking oko stambene zgrade i samoposluge.

– U mjesnoj zajednici valjda imaju prećih briga, dok osoblje “Binga” navodi da u dućanu nema dovoljno prometa da bi se investiralo u parking. Pa zar njihova obaveza nije da urede prostor oko svog objekta?

Na kraju se g. Šerak “dotakla” i komunalne higijene grada. Veli da je nervira kada čuje gradonačelnika kada se hvali da je Tuzla “najljepši i najbolji grad za život”.

– Ne znam šta on smatra prostorom grada. Po meni, Tuzla je od Termoelektrane do Slavinovića, a po gradonačelniku to je samo prostor oko Panonskih jezera i njegovog Tvrta. Kada je uopće prošetao gradom i posjetio Kulu, koja je centar Tuzle, ili Mosnik i druge dijelove Tuzle, pa da se uvjeri kako ljudi žive i kako sve izgleda – zaključila je Ezida Šerak.

Bilo kako, vremešni supružnici jučer su uradili nešto na što mogu biti ponosni i na šta bi se mnogi trebali ugledati.

Istovremeno, “opalili” su pljusku gradskim higijeničarima, osoblju “Binga”, ali i svojim sumještanima koji su njihovu ekološku akciju posmatrali uglavnom nijemo i – iza zavjesa! (tl – Foto: H.S., M.P., E.Š.)

Date: 30-12-2018